

ARLeF e USR a presentin “Il Libri di Maman!”

Un projet editoriâl ludic didatic, dât fûr in 20.000 copiis a ducj i arlêfs des scuelis primariis impegnâts tal imparâ la lenghe furlane

“Il Libri di Maman!” al è il gnûf prodot editoriâl realizât de Agenzie Regionâl pe Lenghe Furlane che, in graciis de colaborazion sinergjiche cul Uffici Scolastic Regionâl dal Friûl – Vignesie Julie, al è cumò a disposizion di ducj i students des scuelis primariis dal territori furlanofon. Il projet al è stât presentât in ocasion di une conference stampe là che a àn partecipât l’Assessôr aes Autonomiis Locâls, Pierpaolo Roberti, il President de ARLeF, Eros Cisilino e la referente pe lenghe furlane dal Uffici Scolastic Regionâl, Paola Cencini.

Juste in chescj dîs a son stadis dadis fûr dutis lis 20.000 copiis ai 180 istitûts scolastics des ex provinciis di Udin, Pordenon e Gurize. Doi volums diferents par fasce di etât: il prin al è stât pensât pai arlêfs des classis 1^e e 2^e, il secont pes classis 3^e, 4^e e 5^e. In gracie dai materiâi che si cjatin dentri – zûcs, contis, proverbis, curiositâts, ricetis, lavoruts, tescj di leterature e conseis di leture – i libris si podaran doprâ tes ativitâts didatichis e in chês di grup, par compagnâ i fruts te discuierte di peraulis gnovis e di gnûfs sunôrs, clamantju a doprâ la lenghe furlane in maniere ative.

“Il Libri di Maman!” al è pensât par dâ a insegnants e students un supuart util par imparâ il furlan midiant dal zûc, dal divertiment e de creativitât – *al marche il president de ARLeF, Eros Cisilino* -. I dâts dal an scolastic 2019/2020 a metin in evidence che il 76% dai gjenitôrs al à sielzude la opzion dal furlan intal moment de iscrizion dai fîs te scuele de infanzie e in chês primarie. Une percentuâl cressude intai ultins agns, che e mostre ben cemût che lis fameis de nestre regjon a sedin simpri plui cussientis dai tancj vantaçs, cognitîfs e sociâi, che al da il plurilinguism, come che a dimostrin lis ricercjis sientifichis plui avanzadis. I volums che o vin dât fûr ai students in sinergjie cul Uffici Scolastic Regionâl, pe ARLeF a son dome il prin pas par garantî ae scuele un materiâl di cualitât pe educazion plurilengâl par furlan. O ringracii la direttore, Daniela Beltrame, pe colaborazion productive.”

“Il Libri di Maman!” al nas de esperience di un projet plui grant de ARLeF che al cjape dentri ancje la transmission televisive omonime, la prime in lenghe furlane dedicate ai fruts, e “La pagjine di Maman!”, rubriche setemanâl su cjarte, siore di zûcs e di spazis pai plui piçui. I contignûts dai doi volums a son stâts curâts di Daria Miani, condutore de transmission tv, cul supuart dal Sportel Regionâl pe Lenghe Furlane de ARLeF. La sielte didatiche dai materiâi di ogni volum e je stade curade des insegnantis Enza Purino e Laura Urtamonti. Lis ilustracions dai protagoniscj a son di Serena Debegnach e di Alessia Battistutta.

“Lis copiis di “Il Libri di Maman!”, a son stadis donadis a ogni Istitût daûr dal numar dai arlêfs che a studiin il furlan. La distribuzion ai students e je fate in comodât – e *spieghe Paola Cencini, referente pe lenghe furlane dal USR* -. Intune otiche di educazion ae sostignibilitât, e ven domandade la colaborazion preziose dai insegnants di mût che - ae fin di chest bien e dal trieni - lis copiis dadis fûr a restin a disposizion te scuele, e lis puedin cussì tornâ a doprâ i arlêfs dal cicli scolastic che al vignarà dopo.”

Altris copiis di “Il Libri di Maman!” a son a disposizion dai insegnants di lenghe furlane e si puedin ritirà tal Uffici VI Ambit Teritoriâl pe provincie di Udin cun sede in viâl Armando Diaz 60, dopo vê fate domande a cheste direzion di pueste eletroniche parfurlan@gmail.com

Udin, ai 13 di Otubar dal 2020